

## LI TIMPS.

Li timps qu'i fait, c'èst li qu' nos mwin.ne :  
D'au bon timps j'qu'au keûr di l' iviêr  
I sème do bin, do mau, dè l' pwin.ne.  
Si l' solia lût, t' aurès do niêr  
Come on tch'vau qui sintereut s'-t-awin.ne.  
S'i fait grigneûs, tot toûne au r'viêrs,  
Ti d'vins vîreûs, gn-a tot qui t' jin.ne,  
Avou rin t' fais one masse d'affaires

Li timps qui passe, li, c'è-st-ôte tchôse :  
Djoû après djoû, sins pont di r'lache  
I porsût s' vôle, au pére dè pôces,  
Qu'i djale, qu'i sofèle ou qu'i drache.  
Ci n'èst qu' pus taurd, quand l'âdje arive  
Qu'on mesure éwou qu'i n's-émwin.ne,  
Qui l' rôlia qu'alignerè lès chifes  
N'a d' cure di Piêre, di Paul di Twin.ne.

Li timps qu'i fait, li timps qui passe :  
Lès deûs min.mes diâles. Po leû plaîji  
Onk tot tchiketant, l'ôte à tote fwace  
Faîyenut fait-à fait ç' qu' il ont dit.  
Qui t' rîyes, qui t' braîyes ou qui t' somadjes,  
Gn-a nuk qu' î saureut rin candjî,  
Ça n' siève à rin d' fé tant d' daladje  
Su l' grand lîve gn-a tot qu' èst d'dja scrît.

Albert Delvaux